

Broj: 02-01-XIX-249/16
Mostar, 28.07.2016. godine

IZVOD IZ ZAPISNIKA
sa devetnaeste (XIX) sjednice Skupštine
Hercegovačko-neretvanske županije

Sjednica je održana 28.07.2016. godine u dvorani Skupštine HNŽ u Mostaru s početkom u 17:00 sati.

Sjednicu je otvorio predsjedavajući Skupštine Šerif Špago i pozdravio nazočne.

Tajnik Skupštine, Željka Čule obavila je prozivku.

Nazočni: Mara Anđelić, Stana Burić, Osman Čatić, Mesud Džajić, Ramiz Fajić, Luka Faletar, Zlatko Hadžiomerović, Osman Macić, Andrea Pehar, Tomislav Martinović, Đuro Prkačin, Dario Pušić, Ivona Raguž, Zoran Raić, Vesna Saradžić, Elmir Šator, Amir Šelo, Ajman Šoše, Šerif Špago, Ana Marija Tadić-Jakovljević, Drago Tule, Adnan Velagić, Amer Zagorčić, Aner Žuljević, Ante Pavličević, Davor Pehar.

Izočni: Boris Bošnjak, Ilija Cvitanović, Anel Kljako i Zijat Mušić

Konstatirano je da je na sjednici nazočno **26** zastupnika, te da postoji kvorum za rad i pravosnažno odlučivanje. Naknadno su pristupili Anel Kljako i Zijat Mušić.

Nazočni po pozivu: Predstavnici Vlade HNŽ, gosti po pozivu, predstavnici međunarodnih organizacija i predstavnici medija.

Sjednica je javna, snimana je i snimci su sastavni dio ovog Izvoda iz zapisnika.

Predloženi dnevni red:

1. Zastupniča pitanja;
2. Prijedlog Zakona o izmjenama Zakona o osnovnom odgoju i obrazovanju (skraćeni postupak)
3. Prijedlog Zakona o izmjenama Zakona o pripadnosti javnih prihoda Hercegovačko-neretvanske županije-kantona (skraćeni postupak);
4. Prijedlog Zakona o izmjenama i dopunama Zakona o koncesijama Hercegovačko-neretvanske županije-kantona;
5. Prijedlog Zakona o izmjenama i dopunama Zakona o elektroenergetskoj inspekciji Hercegovačko-neretvanske županije-kantona;
6. Nacrt Zakona o oružju i municiji u Hercegovačko-neretvanskoj županiji-kantonu.

Otvorena je rasprava.

Zastupnik Amer Zagorčić je predložio da se u dnevni red uvrsti točka 7. dnevnog reda: „Zaključak o spriječavanju prosjačenja na ulicama grada Mostara i drugih općina u HNŽ“.

Nakon usuglašavanja predstavnika klubova, uslijedilo je glasovanje po prijedlogu zastupnika Amera Zagorčića.

Nakon glasovanja, konstatirano je da je prijedlog jednoglasno prihvaćen.

Predsjedavajući Šerif Špago podsjetio je zastupnike da se točke 2. i točka 3. dnevnog reda izglasavaju po skraćenom postupku, te da se Skupština o tomu mora izjasniti.

Usljedilo je glasovanje o Prijedlogu Zakona o izmjenama Zakona o osnovnom odgoju i obrazovanju da se raspravlja po skraćenom postupku.

Nakon glasovanja, konstatirano je da je Skupština većinom glasova, bez glasova protiv i suzdržanih utvrdila da se navedeni Prijedlog raspravlja po skraćenom postupku.

Usljedilo je glasovanje o Prijedlogu Zakona o izmjenama Zakona o pripadnosti javnih prihoda HNŽ/K da se raspravlja po skraćenom postupku.

Nakon glasovanja, konstatirano je da je Skupština jednoglasno utvrdila da se navedeni Prijedlog raspravlja po skraćenom postupku.

Obavljeno je glasovanje o prijedlogu dnevnog reda.

Nakon glasovanja, konstatirano je da je jednoglasno usvojen slijedeći

Dnevni red:

- 1. Zastupnička pitanja,**
- 2. Prijedlog Zakona o izmjenama Zakona o osnovnom odgoju i obrazovanju (skraćeni postupak),**
- 3. Prijedlog Zakona o izmjenama Zakona o pripadnosti javnih prihoda Hercegovačko-neretvanske županije-kantona (skraćeni postupak),**
- 4. Prijedlog Zakona o izmjenama i dopunama Zakona o koncesijama Hercegovačko-neretvanske županije-kantona,**
- 5. Prijedlog Zakona o izmjenama i dopunama Zakona o elektroenergetskoj inspekciji Hercegovačko-neretvanske županije-kantona,**
- 6. Nacrt Zakona o oružju i streljivu u Hercegovačko-neretvanskoj županiji-kantonu,**
- 7. Zaključak o spriječavanju prosjačenja na ulicama grada Mostara i drugih općina u HNŽ/K.**

Prije prelaska na raspravu o dnevnom redu, predsjedavajući je izvijestio zastupnike da je u materijalima dostavljen Izvod iz zapisnika sa 18. sjednice Skupštine.

Otvorena je rasprava.

Predsjedavajući Šerif Špago je podsjetio zastupnike da je na prošloj sjednici usvojen izvod iz zapisnika sa 15. i 16. sjednice Skupštine, te ukazao na tehničku pogrešku na Izvod iz zapisnika sa 15. sjednice gdje je naznačena pogrešna evidencija nazočnih zastupnika.

U zapisniku stoji: „nazočni“, a treba da stoji: „izočni su: Ilija Cvitanović, Ante Pavličević, Davor Pehar, Adnan Velagić i Anel Kljako.“

Obavljeno je glasovanje o izvodu iz zapisnika.

Uz ovu primjedbu sa 15. sjednice izvod iz zapisnika sa 15,16 i 18. sjednice jednoglasno usvojen.

AD1.Zastupnička pitanja

Zastupnik Amir Šelo

Na osnovu člana 83, stav 1, tačka A, Poslovnika Skupštine HNK-a, podnosim inicijativu, da se cesta Gnojnice-Blagaj u dužini od 5 kilometara proglašuje cestom od značaja za HNK-a. Obrazloženje ove inicijative leži u tome da je postojeća cesta Gnojnice-Blagaj kategorisana kao lokalni put i radi se vjerovatno o jednoj od dosta, vjerovatno od najfrekventnijih cesta na području juga Mostara, svi znamo da je Blagaj jedna od poželjnijih turističkih destinacija, ne

samo u Hercegovini. Također postojeća cesta u dužini od 5 kilometara se veže za magistralni put M-61 i smatram da navedena inicijativa je opravdana. S tim u vezi predlažem da Vlada HNK-a donese odluku da se cesta Gnojice-Blagaj proglasi cestom od značaja za HNK-a i time da kanton preuzme obavezu održavanja i sanacije navedene ceste, zato što grad Mostar ne brine nimalo o tom putu, to su sve krpiljačine, a mislim da postojeća destinacija kao Blagaj, kao jedna od poželjnijih turističkih destinacija zaslužuje da ima dobru putnu infrastrukturu.

Zastupnik Osman Ćatić

Upućujem inicijativu Vladi HNK-a i Upravi za ceste Mostar. Na osnovu člana 83 Poslovnika Skupštine HNK-a, Službene novine HNK-a broj 2/05. U Budžetu HNK-a za 2017. godinu uvrstiti stavku –sanacija Regionalne ceste R 435 Konjic-Boračko jezero, prema projektu koji će bit urađen za sanaciju iste. Obrazloženje. Radi se o cesti koja je jako oštećena, koja predstavlja žilu kucavicu za život lokalnog stanovništva. Ova cesta je glavna poveznica naselja sa ovog područja s drugim dijelovima BiH. Tokom turističke sezone pojačan je saobraćaj na ovoj cesti, povećana frekvencija motornih vozila svih vrsta, pogotovo autobusa, kamp kućica, prevoznika rafting čamaca i slično i radi se o većinskom dijelu ceste uskog kolosijeka kojim prolazi veći broj vozila, što dovodi do daljnje devastacije, gužve na cesti i stvaranja problema lokalnom stanovništvu i pogoršanja turističkog imidža područja koje sve više se turistički razvija. Smatram da je potrebno hitno obezbjediti sredstva u Budžetu HNK-a za 2017. godinu kako bi ova cesta dobila sve karakteristike regionalne ceste, što u svom nazivu ima, ali ne zadovoljava. Ona bi trebala pratit turistički rast i razvoj koji sa sobom donosi još veći intenzitet saobraćaja. Cesta u sadašnjem stanju to nažalost ne može.

Zastupnik Amer Zagorčić

Imam zastupničku inicijativu. Obzirom da nije izvjesno kada ćemo razmatrati Prijedlog Zakona o trgovini HNK-a, a prije možda i godinu dana smo ili više čak, razmatrali nacrt, tražim od Vlade HNK-a da hitno na narednoj sjednici donese odluku kojom se uvodi obaveza stolice za kasirku u trgovinama i sličnim objektima. Molio bi da se zastupnike pismeno izvijesti o učinjenom. O čemu se radi? Žene stoje nekad i po 10 sati, nemaju pravo na stolicu, nikakvog razloga nema da nemaju stolicu dok rade, evo u ovim velikim tržnim centrima, imate Bingo, Robot, ne vidim razlog šta će se dogodit ako ta žena bude imala stolicu, probajte vi stajat 10 sati pa ćete vidjet kakve će bit posljedice i to ozbiljno narušava njihovo zdravlje, a mislim da nikom ne šteti ako donesemo jednu takvu odluku.

I druga stvar, kolega Macić je prošli put govorio o putu M-17 i kamionima na tom putu, i ja evo ovim putem apelujem na policiju, tu su kolone po dva kilometra i niko te kamione na sklanja, ono je jedna živa pogibelj, pogotovo u jeku turističke sezone kad imamo situaciju da ogroman broj vozila se kreće tim putem i molio bi i apelovao na pripadnike MUP-a da postupaju sa tim kamionima u skladu sa zakonom da ih sklanjaju sa ceste u onim slučajevima kada je kolona duža od propisane zakonom, kako bi izbjegli potencijalno opasne situacije po imovinu i živote ljudi i nadam se da će se poduzeti nešto po tom pitanju.

Zastupnik Zlatko Hadžimerović

Ja sam obećao na prethodnoj sjednici da ću se svaki put na početku sjednice obratiti skupštini, zastupnicima i onima koji bi me trebali čuti. Naime, radi se o Domu zdravlja Uzinovići u Stocu, koji je zaknut raspodjelom novčanih sredstava iz Zavoda zdravstvenog osiguranja. Ja sam dobio odgovor od ministra, dobio sam odgovor od direktora Zavoda, dakle ja znam da je to bio politički dogovor, Dom zdravlja Uzinovići egzistira u jednoj privatnoj kući i oni su obavezni plaćati zakupninu. Molio sam da im se dodjeli 10.000 KM da ne bi iz svojih džepova plaćali kiriju, ako već ne možemo uć u postojeći dom zdravlja onda možemo olakšati nekakav finansijski budžet tih uposlenika gore. I citirat ću ponovo Marka Poncija Katona koji je rekao „ipak Kartagu treba razoriti“ i razorili su je. Ja ću sve dok se ovo ne ispuni ponavljati „ipak Domu zdravlja Uzinovići treba dodijeliti 10.000 KM“.

Zastupnik Elmir Šator

Ja neću postavljat nova pitanja, čak sam sklon ono što je gospodin Zijo Mušić prošli put rekao „ako ćemo dobivat ovako stupidne odgovore, tendenciozne odgovore, odgovore moćne vlasti na mišiće, onda nema smisla, bar mi iz opozicije nemamo razloga posavljat ni jedno pitanje. I ako ću vas podsjetit da sam uvijek glasao bez obzira ko je imao kakvu inicijativu i o čemu se radilo ako sam smatrao da je to za dobro naroda nisam gledao ko je postavio određenu inicijativu, dali je bio predstavnik pozicije ili opozicije. Konkretno ću se vezat iako nisam očekivao za ovu sjednicu da ću dobit odgovore, nije proteklo ni mjesec dana, dosta se puta desilo kad moje postavljeno pitanje ne odgovara onima kojima je postavljeno da uopšte ne odgovore, ali evo konkretno odgovor gospodina ministra zdravstva vezan za pitanje sufinansiranja rada zdravstvenih ustanova. Znači navedeno je konačno, mada to nikada u budžetu ne vidimo, da je riječ o sufinansiranju rada, tako stoji naziv koda, znači sufinansiranje rada zdravstvenih ustanova, ovdje se konačno razjašnjava da je riječ o bolničkim zdravstvenim ustanovama, što mislim da bi trebalo stajat u nekom narednom budžetu, i jednostavno se na jedan fin način odbija inicijativa da Dom zdravlja Stari grad Mostar, koga je osnovao kanton, bar za sada je, a meni se čini neko duže vrijeme će biti osnivač kanton, se jednostavno ne želi staviti na listu onih koji se sufinansiraju kroz to. Ipak ću morat postavit jedno pitanje u ovome, dali se oni koji primaju sredstva na osnovu ovaj budžeta kantona vezano za kod sufinansiranje rada zdravstvenih ustanova, dali te zdravstvene ustanove ispunjavaju uslove određene prema zakonu o izvršenju budžeta, čini mi se članovi 30, 31, 32, koliko sam vidio? Na to mi pitanje nikad nije odgovoreno, to sam upozorio prije nekih 7, 8 mjeseci.

Drugo, gospodine premijeru, obzirom da ste vi meni rekli kad sam ja tražio amandman, ako se sjećate kad smo usvajali budžet, vi ste rekli „nema potrebe da dajem amandman“, čulo je to stotinu ljudi ovdje, ministri u većem broju nego danas, poslanici, mislim da su mi oni svjedoci, i novinari, da je rečeno da nema potrebe postavljat amandman kad se podrazumijeva da je osnivač kanton, vi vjerovatno niste znali za ovu uredbu, iako po meni nije problem u tome što postoji uredba, uredba se može korigirat, zaboga zakoni se korigiraju.

Drugo je odgovor gospodina Rade Bošnjaka, koji tvrdi da 62.000 osiguranika pripada Domu zdravlja Mostar, a 38.000 Domu zdravlja Stari grad, iz čega sam izvukao zaključak da na području koje pokriva Dom zdravlja Stari grad svaki četvrti čovjek koji živi tu je neosiguran, a na području koje pokriva Dom zdravlja Mostar niko!?

Zastupnica Andrea Pehar

Mene zanima što je sa zemljišnim knjigama na području Općine Konjic koje su izgorile i zbog čega se komplicira upis, pogotovo na područjima na kojima je većinsko stanovništvo Hrvati, konkretno mislim na katastarsku općinu Turija? Tražim da mi Vlada HNŽ-a dostavi odgovor koji je razmatrala kao informaciju.

Zastupnik Aner Žuljević

Ja sam mislio na neki način da delegiram problem vjerovatno koji svi zajedno osjećamo, a ne vidim baš da smo dosada bili u mogućnosti da ga adekvatno riješimo, a radi se o prihodu od boravišne takse kada je u pitanju HNK-a, imamo informacije koje govore da imamo negdje po procjenama od 1.500.000 do 2.000.000 turista koji borave na području HNK-a, a imamo otprilike registrovano nekih 260.000 prijavljenih turista po pitanju boravišne takse. Imamo informaciju da Turistička zajednica ima softver koji je ponudila svim turističkim subjektima koji se bave određenim djelatnostima, a da oni ne žele da prihvate te softvere jer bi na taj način ustvari ušli u sistem na koji bi trebali da na dnevnoj bazi prijavljuju sve one goste koji se pojave u našem kantonu. Ja znam da postoji ovaj problem kada je pitanju federalni nivo, a vezan je za zakon o turističkim zajednicama, međutim očigledno da mi kao regija koja ima izuzetan turistički potencijal apsolutno ne kontrolišemo sistem, bar u ovom dijelu boravišnih taksa, a radi se sigurno o značajnim izvorima prihoda. I ja jednostavno evo pokrećem inicijativu prema Vladi

ako postoji mogućnost da kroz resorno ministarstvo analizira ovaj problem zajedno sa Turističkom zajednicom u odnosima ovoga šta imamo kao neku procjenu turističkog potencijala, odnosno broja turista koji dolaze u HNK-a i ono što imamo kao realni pokazatelj kroz objektivno prijavljenu boravišnu taksu i da pokušamo to urediti, ne čekajući ovaj problem koji imamo sa federalnim zakonom. To bi trebalo da bude prihod koji mi možemo regulisat kao budžetski prihod dok ne riješimo ono što po zakonu treba da bude definisano u okviru Turističke zajednice.

Zastupnik Osman Ćatić

Podržavam ovu inicijativu kad je vezano za zemljišne knjige i evo kolegica bi trebala prije nego što postavi pitanje da ima informaciju. Znači nije tačno da se, moram ja samo da kažem pošto sam iz Konjica i u toku sam toga i ja sam pokretao inicijativu kao predsjednik kluba jer k.č. Turija, radi se o načinu postavljanja pitanja i vrlo je korektno da ispravim krive navode. Znači nije tačno tamo gdje su samo Hrvati već gdje su bila ratna dejstva, znači bilo je i gdje su Bošnjaci, znači izgorile su knjige i ja sam lično pokretao te inicijative vezano za to, znači u budžetu se planira i planirana su sredstva od 50.000 KM, i treba sa federalnog nivoa također da se pokreću te inicijative da se riješi to kada su u pitanju knjige. Eto samo da ispravim znači krivi navod, ništa više.

AD2. Prijedlog Zakona o izmjenama Zakona o osnovnom odgoju i obrazovanju

U ime predlagatelja, obrazloženje je dao Elvir Heljić, savjetnik ministra prosvjete, znanosti, kulture i sporta HNŽ/K.

Otvorena je rasprava.

U raspravi su sudjelovali: predsjednik Vlade - Nevenko Herceg, te zastupnici Anel Kljako, Amer Zagorčić, Zijat Mušić, Tomislav Martinović, Osman Ćatić, Mara Anđelić, Aner Žuljević, Zlatko Hadžiomerović.

Ispred Kluba SDP-a Amer Zagorčić uložio je slijedeći amandman.

„članak 2. točka 5. doda stavka „obavezne sistematske preglede učenika“.

Predsjedavajući je konstatirao da ce se glasovanje o prijedlogu Zakona obaviti nakon što Vlada razmotri predloženi amandman.

AD3. Prijedlog Zakona o izmjenama Zakona o pripadnosti javnih prihoda Hercegovačko-neretvanske županije-kantona

U ime predlagatelja, obrazloženje je dao ministar financija Adnan Faladžić.

Otvorena je rasprava.

U raspravi su sudjelovali: Aner Žuljević, Tomislav Martinović i Šerif Špago.

Zastupnik Aner Žuljević zatražio je stanku.

Uslijedila je stanka od 10 minuta.

Nakon stanke, otvorena je rasprava.

U raspravi su sudjelovali: Aner Žuljević i Šerif Špago.

Predsjednik Vlade je obavijestio zastupnike da Vlada ne prihvaća amandmane zastupnika Zagorčića, na Prijedlog Zakona o osnovnom odgoju i obrazovanju.

Nakon toga Predsjedavajući je dao na glasanje amandman gosp. Zagorčića.

Za amandman je glasalo pet zastupnika te je amandman odbijen većinom glasova.

Prešlo se na glasanje o prijedlogu Zakona o osnovnom odgoju i obrazovanju.

Za Zakon se izjasnilo 17 zastupnika, 3 protiv i 5 suzdržanih.

Predsjedavajući je konstatirao da je prijedlog Zakona usvojen većinom glasova.

Prešlo se na glasanje po točki 3. prijedlog Zakona o izmjenama Zakona o pripadnosti javnih prihoda HNŽ/K.

Za Zakon se izjasnilo 17 za, 3 protiv i 3 suzdržana.

Zakon je usvojen većinom glasova.

Predsjedavajući Šerif Špago izvijestio je zastupnike da, u sklopu ovog Zakona, Kolegij Skupštine HNŽ/K je predložio zaključak koji glasi:

„Na osnovu članka 39. Ustava HNŽ/K („Narodne novine HNŽ/K“, broj: 2/98, 4/0 i 7/04) i članka 95. Poslovnika Skupštine HNŽ/K, („Narodne novine HNŽ/K“, broj: 2/05), Skupština HNŽ/K na sjednici održanoj dana 28.7.2016. godine, donijela je sljedeći zaključak:

1) Zakon o izmjenama Zakona o pripadnosti javnih prihoda HNŽ/K koji je donijet na 19. sjednici Skupštine HNŽ/K održanoj 28.7.2016. godine u dijelu koji se odnosi na povećanje prihoda općinama i gradu Mostaru u HNŽ/K definira sredstva za financiranje prijevoza učenika u osnovnom obrazovanju u jedinicama lokalne samouprave HNŽ/K;

2) U slučaju eventualnih nedostajućih sredstava u jedinici lokalne samouprave sredstva za potrebe financiranja prijevoza učenika u osnovnim školama osigurat će se iz proračuna HNŽ/K transferom po odluci koji će donijeti Vlada HNŽ/K;

3) Zadužuje se Vlada HNŽ/K da do kraja 2016. godine izvrši analizu sprovođenja Zakona o izmjenama Zakona o osnovnom odgору i obrazovanju i Zakona o izmjenama Zakona o pripadnosti javnih prihoda i predloži potrebne mjere;

4) Zaključak stupa na snagu danom objave u „Narodnim novinama HNŽ/K“.

Usljedilo je glasovanje o prijedlogu zaključka Kolegija Skupštine.

Nakon glasovanja, konstatirano je da je zaključak većinom glasova, uz 17 za, 3 protiv i 3 suzdržana glasa usvojen.

AD4. Prijedlog Zakona o izmjenama i dopunama Zakona o koncesijama Hercegovačko-neretvanske županije-Kantona

U ime predlagatelja, obrazloženje je dao Željko Laketić, ministar Ministarstva gospodarstva HNŽ/K.

Otvorena je rasprava.

U raspravi su sudjelovali: Amer Zagorčić, Zijat Mušić, Osman Čatić, Željko Laketić

Usljedilo je glasovanje.

Nakon glasovanja, konstatirano je da je Zakon o izmjenama i dopunama Zakona o koncesijama Hercegovačko-neretvanske županije-kantona jednoglasno usvojen.

AD5. Prijedlog Zakona o izmjenama i dopunama Zakona o elektroenergetskoj inspekciji Hercegovačko-neretvanske županije-kantona

U ime predlagatelja, obrazloženje je dao Željko Laketić, ministar Ministarstva gospodarstva HNŽ/K

Otvorena je rasprava.

Primjedbi i prijedloga nije bilo.

Usljedilo je glasovanje.

Nakon glasovanja, konstatirano je da je Zakon o izmjenama i dopunama Zakona o elektroenergetskoj inspekciji Hercegovačko-neretvanske županije-kantona jednoglasno usvojen.

AD6. Nacrt Zakona o oružju i streljivu u Hercegovačko-neretvanskoj županiji-kantonu

U ime predlagatelja, obrazloženje je dao Slađan Bevanda, ministar unutarnjih poslova HNŽ/K

Otvorena je rasprava.

U raspravi su sudjelovali: Osman Macić, Aner Žuljević, Šerif Špago.

Predsjedavajući je predložio zaključak.

„Prihvaća se Nacrt zakona o oružju i streljivu u HNŽ/K kao dobra osnova za izradu Prijedloga Zakona.

Primjedbe i prijedlozi izneseni na sjednici Skupštine dostavit će se Vladi HNŽ/K na razmatranje.

Ostavlja se rok od 15 dana da se dostave dodatni prijedlozi i primjedbe na nacrt Zakona.

Zaključak stupa na snagu danom donošenja, a objavit će se u „Narodnim novinama HNŽ/K“.

Usljedilo je glasovanje o Zaključku na Nacrt Zakona o oružju i streljivu u HNŽ/K.

Nakon glasovanja konstatirano je da je Zaključku na Nacrt Zakona o oružju i streljivu u HNŽ/K usvojen većinom glasova uz 2 suzdržana glasa.

AD7. Zaključak o spriječavanju prosjačenja na ulicama grada Mostara i drugih općina u HNŽ/K.

Predsjedavajući Šerif Špago je predložio dopunu u članku 4. Zaključka, da umjesto riječi „rok 30 dana“, stoje riječi: „rok 60 dana da dostavi izvještaj“.

Otvorena je rasprava.

U raspravi su sudjelovali: ministar unutarnjih poslova HNŽ/K Slađan Bevanda, Tomislav Martinović, Aner Žuljević, Amir Šelo.

Predsjedavajući je pročitao tekst zaključka, koji glasi:

„Zadužuje se Vlada HNŽ/K da u suradnji sa drugim nadležnim institucijama hitno i neodložno pristupi poduzimanju mjera na suzbijanju prosjačenja i sličnih djelatnosti u gradu Mostaru i drugim općinama HNŽ/K, uključujući i predlaganje izmjena i dopuna postojećih zakonskih rješenja.

Ministarstvo unutarnjih poslova HNŽ/K u suradnji sa drugim institucijama je dužano odmah pokrenuti istragu protiv organizatora prosjačenja i pokrenuti zakonske procedure za njihovo sankcioniranje.

O učinjenom izvijestit Skupštinu HNŽ/K u roku od 60 dana.“

Usljedilo je glasovanje.

Nakon glasovanja konstatirano je da je Zaključak jednoglasno usvojen.

Sjednica je zaključena u 20:15.

Zapisničari

Danijel Groznica
Aida Dedić

Predsjedavajući

Šerif Špago